

無
夢
園
遺
集

無夢園遺集卷之七目錄

壽序

孫宗伯淇澳

李司空夢白

諸儀部景陽

王冢宰帖雲

周文宗柱明尊人

李給諫曉湘兩尊人

高水部明注

無夢園

卷之四

吳司理而執尊人

東粵盧如海

文太史湛持

夏莊浪玄陽

王侍御玄珠尊人

楊見源先生暨許夫人

周宣化闇昭兩尊人

薛恒石親翁

黃鳳潭世兄

吳勉齋先生

魯柱石先生

王惕菴先生

張習之襟丈

嚴懷南親翁

褚麟郊先生

蔣母褚太夫人

張母謝太夫人

缺

俞母易太夫人

劉母成六夫人

歸母張夫人

吳母陸夫人

許母沈夫人

東禪仰峰

孫淇翁宗伯七十壽序

帝臣王佐之辨、無他焉、用與勿用耳、何也、萬古一乾道、軌道一潛龍、潛龍一勿用、北辰不動、天之潛龍也、帝治無爲、天子之潛龍也、洗心藏密、大儒之潛龍也、帝者之世、大道沕穆、其臣何獨不然、至于王乃以政顯、爛然布于域中、夫豈若欲並生哉、一言而道在、臯陶卽此一言、自后世誦之、不過命官之常耳、當時道統之傳、已括于此、其孰能知之、天下之係心于淇翁先生也、先

生遲遲其行以孔孟家法似有不可知者然
馳驅不遑在孔孟則可在先生則有所不欲奚
以明其然也

皇上真堯舜之主堯舜有先務焉非安民不可
非知人以安民則不可此其本先論道而後次
第及于勤政今坐論者未出而恭默思道之心
寂然不動以待之彼謂先生出矣中國相司馬
矣盛德大業至矣哉不知此王臣之用也非帝
臣之勿用也仁錫往受易于錢啟翁先生每有

指授必曰吾聞諸孫先生以此知先生手握圖書之中數呼吸陰陽于泰否姤復之先無時不惕無念不復幹旋搏抗觀變發揮如膚寸之雲滿四海不動泰山之體其孰能知之哉不可知謂之帝臣求爲可知則王佐也已仁錫年家末學嘗于天啟間見先生立朝守正人秉笏權奸悚畏及聆法言曰吾渡大江已酌之江神正告君父矣碩果于剝盡之日介福于簡在之辰矣且弗違况大江之神乎繇前以觀先生之學近

于勿用。繇今以觀先生之身嚮于大用。雖然潛龍勿用。道豈有二哉。且夫版築之服。慶之卜之儼若神人。莘野之客。德之心之。惟其時物化裁亦少費焉。此用局非勿用之局。三代以上。政非畧也。其意主于論道養民而善矣。三代以下。政非苛也。其意主于救民。夫民救之斯急矣。况迫之乎。惟學遜志。乃干戈甲冑之防。尤致勉于從諫焉。昧爽丕顯。及其至也。僅改過不吝。而贊襄之能事畢矣。大哉乾乎。雲行而雨施。何早禱之。

有今甲戌之春惟

帝臣懸弧日升月恒始基之矣乃稱觴者爲父
執朱憲副憲副壯年懸車出處之道甚光遊于
先生之門風氣道上矣爰授簡小子載賡帝典
以效颺頌可乎王者之壽今聞也竹苞松茂皆
成壽章胤祚萬年保其家室祝若臣則曰天壽
平格曰三壽作朋此慶臣主之遭也孰若先生
游于魏蕩之宇坐而論道俾萬邦黎獻樂堯年
而戴舜日生坐養民夫安測其涯際哉

甲戌元
旦筆

甲戌元日筆

卷一

一

百七十年

司空夢白李年伯壽序

天下治平、注意將相、尤不若將相自爲計也。是平格之上壽也。引而伸之、觸類而長之、不過畢天下之能事。士大夫自度所能者何事、所能平格者何事、大觀在上、惟順與異、夬夬在私、惟惕與號、其孰能與于此哉。枚卜從功、功從吉。西陵夢翁李年伯功而吉者也。幾動于微、吉先見焉。天下事自其先而圖之、天且弗違、是謂能事。格君易耳。况將相間注意交驩乎。若是人才取精。

心取淵識取澆度取廣氣取寂萬夫之望取介
取確取惕取厲大臣惕厲則號呼之朋自來君
父順巽則中正之極懋建其在人無咎也無譽
也與人無爭其在天吉事有祥也吉無不利也
與天爭一先莫之或先先天弗違矣翁將出膺
輔宰將相重寄燕居深念何者最先蓋有味乎
其弼直之一言坐而論道三公事也廷臣言之
爲議論大臣言之爲德業心膺思誰不思股肱
直誰不直彼乘載荒度馳驅之勞中智空弗道

神禹曰否、胼胝何勞之有、顧今河患未息、詢謀
底績、萬世功孰大、不明白曉、嚙入告我后、何以
知四方艱難、維汝克勤克儉、帝若曰、下土昏墊、
金錢大可念、至哉言乎、慎儉德、懷永圖、江之永
矣、漢之廣矣、庸詎足漏卮、是以儉德貴也、儉德
而懷永圖、尤貴也、竊覽

國朝用兵、大都農部運籌、什居五六、凡調遣屯
集、大司農主之、樞部受成、事不唯如左右手、稱
如手足之仰、腹心而農部拮据、絲茶足當如雲

如雨之半、是謂計臣、若夫蒿目而已、何計哉、翁
轉漕津海間、其爲滎陽成臯也大矣、曾未數年、
盈詘勞逸、靜譁奚若、不宜齋而諫乎、

肅皇帝龍興于楚、暨我

皇上再中興、四征弗庭、竊惟

神廟相江陵、風行四海、粟支九年、營伍精嚴、廐
馬克斥、崇墉密雉、行萬里不持寸兵、其時賜租
賑荒、劍出而星辰皆動、禹甸再闢於西川、王杲
立致之闕下、皆初年任人力也、

上念往功予殊典况生吾世而价人猶在湘楚
諸君子如雷霆于江漢間翁也應期首出績武
功昌文教以次將楚相楚銓憲楚耳目楚
聖祖實式臨之茲楚大夫授簡吳儂意乎翁聞
而彌惕也惕則號惕號則自備諸君子交相惕
交相呼交相備則宵旰之焦勞什而坤土巽風
皇建其有極順而巽生道也爲龍爲光二壽作
朋天下和平也

諸景翁先生壽序

天地大德曰生唐虞聖人欲並生哉生生之大德卽明德也人皆得人之得而唯日月得天得天則久照大有上九得天熤隆亦唯火在天上明辨晷而車以載之言以享之南伯子葵問乎女偶曰子之年長矣而色若孺子何也曰吾聞道矣至究其所聞道則朝徹見獨以至無古今先生聞道最早滿腔生意坐人春風而未雨之憂每念不忘君父蓋朝徹見獨者歟記曰日

月東西相從而不已。是天道也。人臣事君如日月得天可謂大忠矣。東西相從丘貉庸忽然乎。必如火在天上則大明矣。天與火曰同。人人類相與如天與火。庶無淫朋比德能錫厥類矣。韓子曰以壽與智祝人是巫祝之祝也。千歲魯頌非耶。讀大雅不置錫類。夫唯錫類故出類。善計無窮者生人之類大矣。聖賢之生一元參伍唯無少屑越其同類而不敢自岸異。凡人動一善世不伐之念。此萬有千歲自爲甲子自爲春秋。

而天亦爲其所得。從古天步艱難之時，正天壽
平格之時，先天下之憂而持之于早，所以得天
唯此先生筮仕侃侃，忠貞迄今。蓋桂愈烈，冰蘗
彌淡，柔剛微彰，審握其幾。蓋伊元傅之先覺，衛
武公之彌盈，雖與日月爭光可也。賢子蔚起，競
爽式光大之。茲七十華誕，仁錫率弟門生禮錫
智錫，登堂納履，借箸籌世事。若夫溪雲洞霞，先
生特寄焉，而耿耿丹衷，捧祝吾

皇萬壽杯。公在三壽作朋之列矣。

王祐翁冢宰壽序

當公成進士時、甫踰冠、供事中秘、尋績最、當臺省矣、會方群注而攻太原、相謂公實同梓、且姓嫌也、竟格不果、領虞部郎、出踐臬司之副、舉天下衿紳之地、如兩浙、以畀公、而師帥之自是淳長其事、蓋前此外、憲長無久秩者、獨公濡秩幾滿、始遷楚藩、變例也、既則一拜御史中丞、再晉少司馬、行邊三帥、薊遼一入、大司馬、再入大冢宰、坐鎮陪京、隱然重于中朝、大率公爲小官、則

小官重爲外吏則外吏重急在腹則公腹急在邊則公邊第一時不能分公而兩之而公之控揣虜也犯示之威服予之款萃者用間渙者用撫而其覈邊實也力必歸障障必歸險食必歸士士必歸伍帥筭嚮外毋令嚮內卒勇在公毋令在私歲減金錢耗費以數萬計當是時虜幾不敢南下牧矣旋以代去論者惜之公爲大司馬日權璫嬰視百職獨睥睨次且債帥之賄而時有所不讐然不敢抑天下之公議而絀公度

無可以中之者。則又冢宰隆其位。公孤崇其階。而往之南。示優之。乃疎之也。無何而公亦以假諫。嘻。安石不出。如蒼生何哉。昔成康之際。畢公以太保任大冢宰。召公以太師爲大司馬。彼蓋不敢兩居重也。然二公皆眉壽百餘歲。以左右夾輔周室。而納周治于刑措。今

天子方銳意太平。征不庭。董治官。遠出成康萬。歡且將。兩推于公。公又疆力未耆。天壽平格。所以寅亮統緒。寧有艾乎哉。維猶情與立。錢子辱

與公季子婚。謂余實習。公請所以爲公頌者。乃賦。烝民之四章。曰。旣明且哲。以保其身。夙夜匪懈。以事一人。我公有焉。則又賦首章。而進觴。曰。天監有周。昭假于下。保茲天子。生仲山甫。公爲舉一觴。是月也。距秋之仲。僅踰匝。當復有歌鹿鳴。以佐萊子戲者。則請洗尊而更觴公也。願執以俟。

賀周柱翁文宗尊人八十壽序

天子御極之六年楚翁周太公高八秩歲惟
丙寅昭明高朗雲漢爲章督學在翁周公較士
維揚敬上壽觥猶之花於春明材於鄧林而水
於江漢也古者憲老乞言公卿奉杖大夫進履
八秩以上錫爵給肉粟繒絮有差夫年及格而
德彌邵屬輿恩晉封爲此春酒緩我眉壽太公
寔自膺繁祉矣維揚帶淮襟江而於徐書入於
荆書朝宗直指江陵遙連巴蜀公合斬鄒江沔

光壽千百萬頃波濤澎湃蛟龍騰躍以酌太公
而豈第福祿壽乎蒼蒼矣敷文教飭武衛有德
有造在位正直而干城腹心如史稱期門羽林
蕃漢執經受學斌斌乎翔洽哉於時備兵大夫
西蜀張公東浙周公奉揚雅化勉勉綱紀借某
總戎上太公壽祝曰賓之初筵九十而儼於位
署者武公耶謹侯度戒不虞如面命之既提耳
矣爰授簡某某卽未嘗納履乎聞諸楚縉紳間
公如珪如璧矣式寬且綽矣匪教也萬福來求

優游也萬福來同第祿康哉嘗試原本山川舉
觴酌曰江三路而下險五關以踞亭萬松以嘯
清遠厚善之土風維申及甫其周之翰歟再酌
翁曰桃黃之山翁九螺之逸人鳳凰崖之麻姑
倘有往來其間陪杖屨于梅嶺者歟三酌翁曰
唱長江遠郭之句問幾枝合抱之龍樽浮栢舉
酒紅赤壁夏口如拱武昌如揖迂南極而凝純
叢歟雖然太公天下士也又嘗試稱說詩書尚
論千古詩不曰萬有千歲耶夫萬有千歲非後

也。生人之類無窮，善計無窮者，錫類。錫類維何？
作人爲大，錫類不匱也。謂之孝子、壽考、作人也。
謂之大年、上勵精求賢、思得馮翼、孝德之士，以
保萬年家室。而操南國之公衛，題天閑之上駟。
拜公賜，咸拜太公賜，卷阿車馬，旣庶且多，壽象
也。夫頽爲之童，箕爲之鶴，氣爲之紫，雲夢爲之
連，蘄春使君爲之酌，大斗介景福，且豐芭錫京。
滋元養棟，鍾山祥繞，直接淮壖，光蔡瀋皖之間。
有真人焉，爾昌爾熾，歲始春而日可旦也。

賀給諫李曉湘兩尊人壽序

聖天子踐位之年、徵仕郎兵科給事中東莞曉
湘李先生、用 覃恩加封其太公官如秩、越明
年晉封文林郎戶科都給事中、鄧太母再對孺
人、今太公六十有七、太孺人六十有八、遙舉壽
觴、受辭于余、余與先生同讀書中秘、先生治春
秋、余治易、歲辛未較天下春秋士、從先生問經、
諸生相應以義理之文、漢儒學有專師、而先生
師尊人、雞未鳴、篝燈呼起、以玉子平成、少而諷

誦壯而論議廓然樂饑志廣博而色不伐蓋人
坐春風操澄秋水皆稱海雲先生余又將從太
翁受業焉夫壽以衆多爲象以和平爲義卷阿
之士取其多天壽之格尚其平若是者南山壽
翁北海壽母予聞鄧太夫人幽閒靜端食淡而
好施宗黨化之宜而室家協比民人貽厥子孫
其國億萬斯年而後操簡有生色執爵有舞容
是歲也

天子擴雷雨之解先生寔長刑垣賢者立於本

聖人壽。則老臣幸甚。此春秋教也。職在審筆。謹
紀盛事。

高明柱先生壽序

黔明柱高公累以司空報最書蹟眉初度修酌者詞公自萬里訪余交譜中數十年道義相摩切公至吳門家兄弟執經而叩余至白門君家玉樹琳瑯子若嬌竟夜論文不倦大都奮廓埃壒破開濤浪每構一義淬如芙蓉公鑄才式弘鍊物惟遠滋蘭之九畹亦樹蕙之百畝而操刀風雷之意行于落筆滄繡之中率誠澹然條風孰窺愠喜哉所至乘愛景以字人姦無蹊隨食

樞之鶚化爲好音、蓋節孝家訓、內恕以量物、登
明堂而裔黃矣、宜氣發于星辰之際、而不懈攸
壑、非捍大災禦大患、不以煩巨斧取嶽、插天而
赤霄接、不亦稱其龍從蟲崔之山川、宜爾大夫
庶士、歌南山、頌樂只、賡保艾乎、先是大司空上
公廉能狀奉煌煌

天語紀錄、及權關蕪湖寬而敏惠、而節來榜人
之歌、亦消彈鋏之詠、子大夫餽牽成禮矣、言政
者取名曰尊程、効日下孔門、不然曰果曰藝曰

達藝亦不可少也。在所習而已。說者謂虞廷諸臣不兼長也。然其人豈生而習神人習統均習兵農哉。習于一而後無所不習也。破庸人之論開功名之門。唯不拘資格乎。

聖明在上。斷行之矣。今夫富邦國。任百官。生萬民。非事典不與焉。彼胼胝荒度。瘠其身。呱弗子。告有辭。而錫玄圭。貢賦惟則。使堯舜富與天無極。使堯舜壽。然後知司空一官。計生民遠。斯計國家遠也。漢武帝元光中。始算商車。其後又算。

民車及船則前史誌之凡民不爲吏不爲三老
騎士有輕車皆出一算與漢高抑末重本困賈
人不得衣絲馳騎者遠矣于是隱度率貸鬻買
之政紛紛焉公獨仰體

聖明急孤寡慈商旅至意及于寬政亦無虧水
衡額乃知人情聖王之田士大夫不患情有餘
而患情不足萬水所漑觸地成川得人情而善
用之緩急足相使傳中丞堯俞不嘗憫積欠之
苦申帶納之令乎朱紫陽不嘗條上輸過八分

版曹住催之政乎此二公者豈不念國家之急哉能用情小民而後能用情社稷嘗讀古詩一曰嬾天子一曰嬾庶人嬾庶人所以嬾天子耳不然帝王豈受臣下之嬾而蓋臣肯獻嬾于君也哉公之見及此于養生亦善矣精神者物之貴盛者也造物之真氣不費則善計無窮如大雅歌萬有千歲以昌厥後至于公皆質言也哉

賀吳荆翁老年伯壽序

蓋讀不遑將父之誅天子念其臣也暇之時日夫出入顧我親於人子嘗有餘暇而王事靡盬不遑啓居北山大夫以爲勞惟暇則愛親之日長惟勞則思親之善生天子殫其精勤果敏於政事致其暉緩樂易於庭闈且代爲咏歌代爲敦勉勞其力暇其神暇之壽也勞之壽也何執年丈應天啓首科取上第司李濟南以廉明滄澹以全活人延年以平反加飡荆翁老年伯明

年臘月躋七秩預授簡於仁錫佐酌者詞不旣
暇豫乎哉翁承樊陽二明先生之學孝友孤清
雜茗酒於詩書好施與讐不義爲何自樹長吏
所過間而式伏臘存問者也王孺人有內德寬
之於讀籍甚費序邵室闕官徽音可邈焉課子
及孫賦抑之章交勗每聽書聲如衆山傳響青
紫斑爛法醞大斗造物者壑以予翁翁受之不
驚黃耆鮑齒猶汶山之江漢菲祿爾康矣甚矣
詩人之厚也南山有臺迓壽以德又致望後之

人夫人子以旨甘奉其親不如以職業壽其親
於一民一物也惟恐傷之曰是吾親之寒煖也
於出入輕重也無周內而疎網曰是吾親之欠
伸也矧今日之三東也夫東人之子呼三星而
不應呼牽牛服箱終日七襄而不報有賢司李
焉摩搔其疾苦天表之應河海潤千里是謂以
職業壽其親寸山尺水興雲吐霧而太山雨寰
海東省漕運咽喉昔有老人點其地遠近三百
餘泉漕大利

天子爲予封秩司李君猶之萬斛泉欲令治獄者務先寬夫表之應在岱宗長生之簡是謂以德澤壽其親蓋聞曹參爲相若不爲相汲黯爲太守若郡無人然而漢朝無事淮陽刑錯者參德優黯威重也東省大饑師旅騷然若渤海治盜平原無黨龔史皆吏茲土閭里不訟於巷老幼不愁於庭君子以斷小人以活使君饒爲之以此將父入則鼓鐘出則謳頌甚暇矣於是荆翁聞而祝曰

國家之深仁厚澤與鴈山龍湫俱無極也天子
萬年臣與山澗之叟詠歌至治教子盡忠煌煌
景運如日方升焉可也

壽東粵盧如海序

余不識如海、識其快婿仲玉梁兄。古詩有云：「壻貧如珠玉，仲玉筆挾壯。」濤良不貧，其丈人不貧於海山翁。自爲壽與海山之益翁，卽壻不能加以珠玉壻之友，堪溷以瓦礫乎？少讀桃源詩，記愛其詩，啗其記。記中漁郎入老幼，閱觀主賓雞黍，見似人者，喜山中無曆日，有逢迎，狎子孫，貪朋友，分鳥雀糧過矣，過矣。漁郎復出，又復入俗也。太守強之人俗之俗也。問如海住何山，曰金

榜山臨海乎海曰環鑑、負長虹乎橋曰伏波、仲
玉曰翁之號或取焉、以捨故嘗在海山未可戀
也、或取焉否焉、皆未可知也、此一、字非貧如珠
玉者不能道、余又強之曰、其人何如、仲玉咲不
答、但記得六十有三、其甲子、今六月、其降嶽耳、
使桃源太守聞之、必且執其裾、刺刺不休、而余
兩人不爾、夫珠玉不言而愛、喬岳不言而尊、不
經致天庥、秘書光焉、能興雲致雨、玉簡藏焉、余
與仲玉得免漁郎太守之俗者、以翁乃不俗人也、

文湛持年翁壽序

錫類者壽。錫忠義之類。恒久而不已也。壬戌之秋。吾鄉正人。或尊宿詞林。或肅清銓政。湛持海內一人。太廷獨對。余幸朝于松柏。而夕于薑桂也。顧翁獨懷遠慮。携手殿陛。必稱伏蒲披鱗。代若而人。固知高岡將鳴。及渡江泊京。口傳翁疏。燈下讀之。排逆擊愆。惟出入起居。是茲是凜。庶清明康強。強臣言效。而首科擢士。報禮斯重。當是時。璫刺恨留中。微福清師引。二羅節義狀。

元暉之幾叵。翁自爲孝廉。介性直節。篤孝著聞。及里居。益務恬肅。謙穆杜戶。精修孳孳恤民禦虜。殫研碩畫。道味冲然。余再出山。逢人率爾對曰。湛持忠厚。有至性。奚憚之甚哉。璫客銜之疑。受翁使坐。翻局謀玉。繼日以夜。余大笑。自翁還。朝直諫。權要肆蜚謀。中翁而復。令錦衣嚇余。貽書詈余。余更大笑。不令惡言入耳。亦不屑白其眼也。于是自喜束髮與翁交三。四十年。同榜同下公車。同謫同升。又同譏。而其間下第良

久渡淮涉江。酣適之味。友過于登第。更似遷謫之趣。雋永于賜環。兩人于世態之外。殊落落相得也。今逢初度。僅隨同紳。執簡侑爵。胸懷能已乎。君臣相知。自古難之。如讀其文而凌虛聞其言。而前席貽諸子孫。而歎奇才。亦文學議論。然耳。又如欲相鄴侯。匿之他所。而府兵一議。已不能力行。奚益哉。翁于講筵。引書極論。固宜注繹側席。而所論斥。悉俞昌言。則翁之受知渥矣。文毅文恭之策。以言顯也。時也。昔

高皇帝創禮賢館而桂公上萬言書以寬仁爲
主則稱大儒一人今我

皇上克復舊章務孳養元元翁入而輔理茲其
時哉萬有千歲自詩人侑之則不諛余所云錫
忠義之類是已彼一時昌言自翁世道重炳此
一時也小人何恃而不懲君子何畏而不果無
爭往復之小歎共結忠義之大年惟雷風並行
剛柔皆應乎長我

王國受天之祐萬有千歲謂之善祝也宜

夏玄陽先生七十壽序

玄翁夏太公以積學冠大猷天子擢爲莊浪令所司奏其狀曰明憶松江之鱸解殺函之組湖上隱吏紅塵自遠今冬稱七十黃髮壯猷素心白首賓筵趾錯摛詞孔固波來酒似霞以萬頃爲千日矣劉叔翁辱在姻婭維舅氏藐孤是尙詔侑蕪辭愚猶記叔祖紹翁述太公所以治秦秦之平涼國四塞轄莊浪邑地徵不輦司農省道理費費乃更劇官吏互穴輸者不券計畝

再徵縣呼不息，如有年公，憮然曰：秦號天下
動，出征念同仇，板屋亂心曲，奈何堪此哉！立繩
詭法，數人較登其數，官民半邑，供全藩大僚，檄
下如雨，所司六人，以家償役，公減其四，符牒至
立召給之。大吏重公才，而積蠹空鉅，患息他所
釐革，大都倣國子治鄭法，以是秦人至今思之。
既解綬歸，食勝聆善，遙山晚碧，極浦寒清，公于
其間咏而遊焉。古人有言：豈思天路欣及舊棲
我，觀宦達懷舊幾人，彼且以宦爲命，以署爲家。

赫赫自得而日夕氣清戢羽森標非賢達罔聞
夫願酒熟願田疇願桑麻長願無違此古人至
奢之趣今人猶若不足其躁靜別耳太公之居
官也嚴而持身也靜夫大冬嚴雪康侯異于羣
卉懸孤季冬肅肅其風保合利貞以升以恒昔
范宣未嘗入公門韓康伯與同載誘入郡范于
車後趨下太公其高林之雲翮歟王右軍語劉
尹故當共推安石劉尹曰若安石東山志必與
天下共推之恐其爲世緣所累真太公真想在

襟被褐自得與哲胤若孫賞竒文析疑義與田
父數晨夕招近局立善以養真敦風在友生必
不作一丘一壑之計此卽太公所以治秦者也
愚又攷宣德間郡黃鏞汝器繇貢舉服官廉勤
以懸車引年詔進三品階列中列大夫年至九
十餘先生一試于秦而效造物者以年酬之上
念秦關不聳稽人更生繫循良保尚猶詢茲耆

壽俊哉

賀王侍御封翁壽序

侍御玄珠王公按西粵、西粵古桂林地也、被山帶江、驪馬所至、插獨秀之嶺、銘伏波之石、文武吏士、父老子弟、諸夷酋部、咸上御史大夫、頌公辭曰、家大人之教也、夫秦越人之技、不若其兩兄、而名不出宗里、微越人自言、兩兄名弗顯、家大父教不佞曰、吾聞桂管風尚清淑、而俗醇古、見百年之老、試停車問之、士知經術乎、絃誦爲嶺南最乎、民訟簡乎、兵賦鮮乎、樂音閒美乎、山

深水澗漁歌吟答平、楚黔交廣之衝、徵調不乏
或蠢蠢焉、其地曰始安、無擾也、靜江無撓也、何
灼然功哉、灼然而功、熾然而名、越人自末之矣
不佞尊行之、於是文武蕃、漢率上太公壽、柱史
行萬里、錄而翁開七、袞於明年之春、王諸大夫
曰、綵舞方新、嘉平始臘、盍少停驂乎、先生曰
天子萬年、麟趾百世、重華兩作、萬里呼嵩、上金
鏡、箴丹宸、邁行哉、柱史入

朝補闕、禁近直言

無隱

天子嘉乃績、柱史拜手颺言曰、臣父之教也、臣何力焉、

上方視太學、憲老乞言、屬萬年家室、壯翬飛鳥、革之觀、一索青陽、肇竹苞松茂之盛、覃恩及乎殊俗、尚猶詢茲黃髮、吾儕執爵之詞、不其侈歟、常試問先生、冰雪也、而綽約松栢也、而桃李、鶴而不癯、仙有道乎、志有之、食靈飛夜光、總左右、御史之任、可得聞歟、先生曰、所貴乎神仙者、至樂也、至便也、不擇味而易、不選色而西子、不

審音而簫韶矣。敝敝焉。勞身苦形。孑然於山谷
哉。宜其教子以忠。教孫以文。協氣澹如。跡跡焉
舍者與之。爭席歟。管賢詮山海而停雲思親友
夢軒轅而素心偕田父。有以夫。諸大夫聞柱史
公之言。可以采風。曰先生之教也。聞先生之言
可以養生。曰廣成子之教也。爰授簡於余。爵而
賀先生。賦南山有臺。再酌而賀柱史。公賦皇皇
者華。

楊見源先生暨許夫人雙壽序

才德弘傑者其人尊、山川出雲者其報崇、嘉賓
燕樂者其氣新、楊先生觴年琢玉、晚對天庭、方
剛膂力、佇展壯猷、辛酉冬降嶽之辰、與老伯母
稱具慶、雙壽叔來舉龍飛第一、檄伯仲仲起雷
門、假息賞歡、文酒庭宇清而管絃亮、某猶子采
愉樂以奏韶英、旣從三君子友生後、老伯爰之
冬日、咆之文律、惠風勝氣、爭願執籥、南山歌萬
年樂、只如鳧鐘蓄韻、柯篠儲吹、新文陽發、下里

柔翰若錐處平原之囊於是叔來郡同籍授以
綵箋曰牙管旣拔芝泥將熟萬有千歲式賡眉
壽絢朝虹於壁渚唯子言是弋謹拜手颺言老
伯雄文勁節劔氣弓聲天下文人節士爲氣所
召撫雲山似我輩書畫可聚米而船烟霞可傳
檄而定家傳正始以名教爲已任夫不忮不求
雞鳴昧旦賢夫婦交勗焉老伯母貞儀慧識延
植善果儉秉家勤抱子寬翁于讀手拮据躬耕
緝洗不令翁知佐翁色養一庭孝睦柱礎人倫

今求珠于海徑寸先得而圭章特達聯翩繼起
盛德樂事末學小子詎能抒頌萬一諸君子方
奏鹿鳴之雅嘉賓氣新雅不云乎人之好我示
我周行天子若曰爾之鄉有傳聞道術之要才
德雄傑是多士之指南也宴饗勸忠杖屨致敬
德音遠聞乞言憲老將改容而禮焉夫王者之
勞使臣也將父將母代之來諗無亦簡書埤遺
不遑靡監今邇駢駢之四牡隨鞞鞞之弟兄省
鞞掌之王事慶嘒嘒鳴之友聲甚和且暇是以坎

鼓蹲舞祗酒掃陳饋乾餼不愆之末而頌天保
者詒之多福茂哉松栢無不爾或承矣承以三
君子且古者諸侯升俊造於天子遣之日唯行
鄉飲酒禮賢書甫登天府序齒一錄郡國共傳
茲以宴樂嘉賓之心曳履鳴驥上壽尊行少長
有禮不亦齒譜增光乎授簡于小子亦少與少
齒之義也夫以兩都賓主之最兼二陸兄弟之
三叔來旭日方升其二尊人之初度乎伯翀仲
起照乘而密積之切玉而謹鑰之傾都名璧而

深帷之蓄厚流光與叔來後先登于朝是二尊
人天保戩穀自今伊始而耄耋而期頤萬有千
歲之眉壽也

賀周闇昭父母偕壽序

今歲辛未

上開文武闈右武闈也與文士等六月銓選以
文士試邊左僅若而人周子闇昭與焉周子余
器之春秋初擬首及館選高論蔚起蓋鳳凰于
飛翩翩其羽爲之賦嘉賓至樂也將父將毋迫
之以簡書練之以戎馬壯之以吉日然後其親
左右顧先後禦侮無非士也其親左右顧戰陣
愾勇民人悅樂無非子也于是萬里之遐不見

兵革嘉我二人、泰山四維之矣。閻昭尊人子亮、起家太學、與母陶竝躋五十。閻昭旣成進士、以粵西宣化令捧觴厥高祖恭肅公白川翁豕宰、初官給諫、督兩粵。閻昭筮仕、亦在粵西。亢宗乃世、今吏道之所事者、簿書期會、刀筆筐篋耳。過此超然遠矣。閻昭不俗、其吏卽不俗、其親况分疆土之憂、耀明光于海隅、日出兩江之間、實繁有徒、隣趾連犴、自古憚遠、莫如清禦、敵莫如備導、利莫如便、故曰耐煩方是道、爲政之道最戒。

擾民次則聽民治生之道最戒多欲次則屏欲
然而大道不貴何也耐煩是道聽之則愚寡欲
是道屏之則固子亮翁世名宦也而澹若處子
習紛華也而素心若田父乃至五十稱字未著
別號不虞廣大而侈也以寡欲進聞昭道心坦
白高才若虛不虞憑高而倨也以耐煩進嘗謂
國有珍瑞家有師保莫如封君吏而廉者什之
一、封君而賢者千人之英萬人之傑翁汲水灌
花邁征課子里薰長者之行宣化新政不蹉馳

吳江試倚長橋聽之、何異張樂于洞庭哉

賀薛恒石先生暨韓夫人七十雙壽序

自琴瑟靜好、咏於雞鳴、昧旦之章、而頌岡陵、必曰令妻、泮奭優游、詩人所爲、歌偕老也、歲丁巳、恒石翁、甫申肇厥祥、明年韓夫人設悅、夫婦偕隱而賢、寤言弗諛、喆胤適上金、緋綸狄行、貴其自生矣、維時朋舊、拜手颺言曰、七十年來、疇被服閒閒、擎歛篤摯、爲善不近名乎、疇供饋燕樂、蕙肴蒸陸、海之珍、絲吹飛蓬、閭之句乎、誰澡身浴德、擷申椒、紉芳蘭、以彥方知爲懼乎、誰柔嘉

維則無非無儀未解孟公之醒已張北海之尊
乎賢哉翁若夫人月旦彤史女儀士行天祚明
德引滄溟以爲卮固宜吾聞介而恒者莫如石
介必厚厚必壽大哉恒乎匪雷風孰與于此豫
雷出介石獨持及其作樂擊石拊石蓋石能擇
交能生我石也者交游中之父事兄事也吾觀
以情生不以情謝者莫如石我實自生克爲巨
壘無敢褻眎吳自四飛肇祉大石縣而復起東
望萬笏浴日天池別有神麻浮于五湖南金美

箭、滲、溢、羅、駢、篤、生、耆、俊、與、石、嶙、峒、恒、石、翁、其、人、
歟、始、翁、遭、際、何、太、差、畢、嶽、嶽、竟、屹、柱、介、介、七、十、
年、一、日、哉、世、俗、囁、嚅、揭、肝、胆、臨、小、利、害、色、戰、神、
胸、臂、掉、羽、飛、翁、少、任、俠、代、族、子、蒙、難、雖、竟、白、額、
刀、鋸、在、前、孰、勇、赴、蝟、矢、哉、母、夫、人、見、背、呱、呱、三、
齡、耳、愷、厚、性、生、事、繼、母、諸、庶、母、務、盡、志、盡、禮、濟、
濟、昆、季、將、鳴、將、躍、翁、愛、之、如、竹、苞、矣、逾、于、同、胞、
目、擊、鮮、洗、腆、以、娛、垂、白、之、老、親、以、樂、終、故、曰、此、
令、兄、弟、綽、綽、有、裕、翁、內、固、而、外、爲、採、其、寬、兮、綽、

今以身爲舟車者取課子也操先業必平準無
錐刃習詩書必孝弟無纂組擇壻也素封而爲
德于陰者許勤學而好行其義者親太媪相之
內行淳備肅于嚴君三胤如朱明之燦而仲君
親仁好學于公之門實繁且庶家弟蓋卿翁壻
也而子每慷慨周人之急曰寧厚寧恕惟我婦
翁是師常旨其言以告賢士君子正直本于忠
厚翁可法矣完初韓君老成典樸兢兢矩蹈熙
如王君扶搖初奮霄幹益挺翁有快壻三惟示

之周行是則是倣耳夫化行于子壻譽洽于宗
祊韓夫人周旋黽勉二人同心宜爾子孫眉壽
無極已夫停雲以遲良話斗酒以招近局此其
客必孝友之張仲抑無雜言之田父耶余嘗與
家弟厠翁賓筵稔翁威儀棣棣德將無醉蓋孝
友忠信言有物行有恒介然古君子也今茲七
十甫告嘉爵敬賡南山爲翁與夫人百歲慶

黃鳳潭壽序

吾黨尊事鳳潭先生以壽善貞固黃髮不怠且以道義勗其子以貞節自表見匪緣金紫也月令饗壽星于南郊壽星者弧南老人而膠序之中篤于老更時雖執爵執醕大賓虛左翁居東之東南鄉稱老成人云歲其登矣遺秉滯穗仁風翔湧時稱築塲納稼相與朋酒羔羊躋公堂陳兕觥感君上之懷保如此其情摯也予謂此風昔行于堂皇今似僅行于閭閻然鏘金戛玉

持羊酒相賀不怠也。儀式型之，將其內心亦罕矣。我瞻鳳翁如南山，有臺心乎壹矣。以執爵有辭矣。伯閭諸親友之言曰：禮之生本諸情乎，有稱慶之儀，以節其鼓舞，有祝嘏之頌，以聲其謳吟。余乃援引人物志志所列十有二流，以清節家爲第一，謂其可任師保。次則三才純備，德勵風俗，目爲國體。翁守經據古，不阿當世，是師保之望也。入其里門，必恭敬止，是純備之體也。遠心厚度，正直委蛇，是風俗之師也。汎羽籥野老

爭席澹名利鷗鳥狎遊占春闈六月一息課孫
子並棲雙雄角巾教習之封翁入無妍冶步花
踏雪之芳履出無車徒凡聚民而讀邦法者執
經而問令嗣者何異躋公堂而誦聲誥奏律呂
哉坐而論道謂之三公及三王之憲老也皆乞
言爲惇史父老與三公並尊朝堂與鄉黨並貴
師世範俗厥有深忠熟思攸好德謂之平康翁
五朝耆舊勸相我國家高明顯榮之泰運所
稱可任師保目爲國體者歟榮啓期行年九十

彈琴以歌皆生人之常事可常斯可久可久斯
可太漢申公不云乎顧力行何如耳翁世有顯
人入而論道亦猶是也人倫以爲宗詎一鄉之
私祝哉

吳勉齋七十壽序

文端公讀秘書忤中貴出爲南曹郎及官宗伯忤宰相事肅皇帝辨論大禮明諄勇退海內壯之歸述韓魏公言保晚節難每事加慎此後世臣子法訓子義理震心勿仆厥後光昭令德如少叅公繼今大叅公皆以靖共巍碩佐聖明躋臚任柱礎人倫而勉齋先生博雅篤行古君子也蓋無忝其祖云丙寅孟冬先生七十友人郭仁仲詣予以賀之言屬予兩人私議先生簪

裾常滿而實類古之門庭寂然者烟艇常淨而
實類古之足不窺園者彝鼎常陳而實類古之
運篋鼓缶者以爲幾幾肖也凡人矜於色而先
生餘于性日餘而日拙日拙而日真今夫嘉樹
植於上苑岩谷之質自存貞松秀于三春冰霜
之操自紉知先生者卽于紅萬紫而叩希淡之
玄工卽車馬撩亂而得滿城之春意卽持身豈
弟不甚出圭角而廓然見王謝家數有臨深登
高之想卽賓朋絲竹肴核惟旅而介然辨風急

天寒當門定足之品。吾聞士生于世可以百爲
惟不可俗。然欲不俗而高自標置。俗益甚。觀其
朝夕父子相薰。自戒道種。教戒親戚。皆長者之
言。往來有素心之士。此真不俗矣。昔賢謂不難
規矩。直造先天。而又有云。假饒一規一矩。何當
于本心。真不真爾。使先生通顯。必任士清貧。必
介士登壇。玷而稱引。濂洛必理士。今身旣高隱。
家累三公。以齒頰爲孔孟。又不屑。則惟陶陶自
率。其真旁觀吳俗。素封而儉于容。小才而侈于

貌望其人、不雲不雨、早既太甚而已矣。余嘗與先生深夜坐博、極群書、手錄千緘、所著韶秀、娟雅、晚好易、焚香靜對、志抑抑自下、務沒晦不令人知、人亦鮮知之者、直謂公與人同、爾夫同聲同氣、同人易也、皆乾學也、家先中丞藏文端公二翰、一題五同圖、有一郡莫如今日盛句、一官大理時、簡寄長律、如菊田瓜涇石城粟、夫君謙或判院、或叅藩、或領教、或予歸、三致意焉、昔也一郡之盛在朝、皓顏尊宿、相繼卿貳、而文端賡

雅歌於長樂之鐘鼓今也一郡之盛在野黃髮
壯猷強半里居而先生揖清曠於五湖之釣叟
則義理養其心而晚節芳其譽詎非朝詩書夕
師友力哉方少叅公之初李台郡也所司覈其
最曰文章收歛而不浮固知遠器聽斷精明而
克允尤見全才公喜形於詩時少叅公自天台
寄福壽康寧燈傳觀吳下嘗兩月得子文得孫
文端公以涑水延陵程純公爲訓今先生諸賢
胤長君學究天人爲大司成體重行獨對形

堉次公苦思精心名理叔氏左右滌其季君矯
首奮飛予攸好德歛時五福貽謀不更遠乎余
惟不文述其厓畧以復仁仲爲諸君子侑爵竊
附傳史云

魯柱石先生七十壽序

吾人誦法孔子、孔子仁壽天下、大都進狂狷、斥鄉原、萬古壽域常開、奚數乎吞氣九千、若玄家言、今夫百千世界之生氣、皆狂狷一流所植立也、叔季自君臣父子兄弟夫婦朋友、無不以鄉原行之、直是延生計拙耳、愚所見卓立千仞之上、遇驚湍迅颺神、不少旁睨、唯柱石魯先生乎、先生師事少湖王翁、翁一字不輕許人、鄉原之習至、王翁而悉拔、吳中壽域一開、王翁所止、耿

中丞書以志節許先生華袞若新然以和靖之
品侍伊川學猶慮不副孳孳敦勉今先生自執
經門下距今數十年剛嚴勁直如一且先生不
負王翁自王翁後鄉原之習至先生而又一拔
吳中壽域再開今七十懸弧都人士陳詞侑爵
甚善愚獨考皇極經世一時一世凡三十年積
計之一年一元爲十二萬九千六百年蓋一歲
之內朝乾夕惕揭日月行盤旋十二餘萬載何
羨乎仙喬哉蚩蚩者計一朝一夕是以効爭年

鄭人耳何不閉戶造軌既勤菑畲而驕驕其莠
東西易轍取千紅萬紫車馬撩亂若大冬嚴雪
當門站足者幾先生誕于花晨質凜歲寒介如
石不測如風雷遇雨爲獨行之夫逢川爲必涉
之謙侯以建師以行惟其入地之雷藏心于淵
靈根厥茂故至晚益芳到天不屈耳先生經濟
名流著甚膠庠僅襲世勲非其志矣當官廉謹
務伸其志不少媿媿昔賢居江城賦詩云除却
借書沽酒外更無一事擾公積先生居君山卽

借書沽酒、遠之若逸、懸魚矢諸性哉、關廟議鼎
新父執林、舅氏吳、皆曰、魯先生里彥、方非一諾
不可、三請三辭、既精白受事、設十藉以徠同志
條教、惟恣張空拳、冒衆咻苦心、調劑呼號、義從
捐囊佐之、身自面目及肝胆、家自主伯及亞旅
悉罄而致之、有赫悠悠、蒼天何計乎、人知有道
君子固已知之矣、當棟當楹、顧瞻周道、宜義問
之、與廟貌齊也、天地大德曰生、浩然之氣不曰
生于仁、而曰生于集義、唯其義所以仁、聖賢路

上人祇此一念一行可必焉耳。故孔子取狂狷。孟子黜夜氣。皆所以開生路。示長且也。孔孟諄諄垂訓以剛長爲引年。而彼昏不知。必羣趨于闕然之鄉原。先生能不力障其瀾耶。復亨剛反七日來復。剛反于七。長于九。爲純乾。大生廣生。生生之謂易。春日載陽。萬古如是。先生平康正直。其徵歟。賢胤皆公輔重器。董賈文章。濂洛趨步。令德令聞。世世以名節孝義重。孫枝如立。作質有其文。先生化行于家。望着千里。誠信質于

卷七

聖

七

神明熾而昌壽而臧說在君子萬年之章矣

王惕菴七十壽序

夫侈言於博聞有道之側非愚則諛憲老乞言著爲典而登堂納履無綺說長幼相成其敦恪若此古列國大夫燕饗間稱經引典有唐授贈之什半嘈佞猶比賦之遺也今供獻妍之具而已愚不及遊仁孝王先生門心師之仁孝先生門人以其行謚者也愚未執經而稱師所師有在也惕翁先生克爲子春秋高七十姻婭春野徐君謀以質言壽蓋聞師日讀易論說其在有

云並天地以設位合乾坤以成列曰人其於天地也可先可後能先能後夫先天後天之訓明人子之先後乎親而教萬世行孝之遺帝出乎震自足下始惟孝弟是蹈惟規矩是遵一舉足不忘父母也歷齊巽至成艮而人道具手探足躡無非孝也大者尤在兌口離卧下兌月上上下相易曰革口舌之過除而文明徹是爲虎豹炳蔚之象一出言不忘父母也目惟正而南而上則明耳惟傾而北而下則聰所謂視于無形

聽於無聲也。惕菴先生幼承家學，力行善，唯日
不足。乾下艮首至手，乾下坤首至地，以叩天下
之人，以來天下之善。先生虛受以之，十三卦震
合者六，震長子，體仁長人，故震生一脈，其究爲
徒。今弘之又以孝行嗜古聞矣。先生及哲胤居
震以之，羲皇八卦，父母六子，森然一堂，嗣續無
窮。種人道生生之因，今弘之諸賢胤，又以雅飭
奮質有其文矣。先生宜爾孫子，世世式穀以之。
愚治易謹執經以颺言，亦納履之意也。武公年

九十而有覺德行先生豈少讓哉

張習之壽序

漢詔三老尊年也。孝弟淑行也。國家甚重之。當其獻賢能之書。孜孜斂材。詔諸父兄所聞道術甚博。禮方岳。召百年。褒予賜爵。有秩者。加實。宜乎香洛之老。如珪如璋之彥。交口祝習之。夫而屬詞不佞。以辱在肺臑。知習之廉于官。篤于誼。勤于教也。

天子惇德允元。而尚齒。歲已巳。吳大有年。公六十。初度。夫藐姑射之仙。神人居焉。物不疵厲。年

穀熟、庚桑之居畏壘、三載大穰、君子有穀、詒孫子、惟公初度、又抱孫之年也、公禔身淡雅、與人游處、和平寬恃、不爲崖異、黽勉有無、困者以解懸、窶者以舉、火江淮之間、吳爲都會、素封之取精也、宏公廣心浩意、一行作吏、袍笏蕭然、漢庭所稱長者、遊于賢豪間、宜停車市門、伏軾而問已、老人星見、則天下和平、與奎壁光映、公壯年子處、縞衣綦巾、永矢勿諼、撫胞弟之子如己子、而卽子之勗之曰、所貴天下士者、謂能博綜研

徵修舞著義假徒帖括獵一第立致青雲之上
奚足道哉于是鍵關下帷讀不見之書劬芳鮮
之韻試輒冠軍雖宿學不能及也余與商藝論
道每目擊心賞何異金泥玉簡赤英絳闕之標
緲哉善祝者舍是奚之焉二難玉立以是益務
希德力田奉公而以羸羨購古書彝器陳之几
席游衍其中尤傾身折節尺晷造請連騎四出
有結駟之滌而跡遁于丘壑有鶉居之逸而名
重于廊廟其行義皎然有足多者昔鄭莊好黃

老之言、公理著論、以呼吸精和、求玄虛之旨、若
公仕而知足、治生而好行其義、試與二難、靜叅
易理、自天祐之、可操券矣、余丁酉始計偕、獲侍
修翁太公、慷慨重然諾、有萬石君風、少游京華、
出入承明之廬、擊鮮供膳、出納讞斷、惟明允采
于、至今誦之、公爲舞綵娛親、飄然解組、一觴一
詠、笑傲湖山、紛紛金紫、望眉宇不翛然、自遠乎
墳、篋迭奏、裁五色之雲、以壽其親、余不佞、當復
介諸君子、爲此春酒、願樂只未艾也。

嚴懷南太翁九十壽序

余之識少司寇嚴雲翁也自家王父握手公署始當是時翁官御史大夫王父勸之隱翁語人曰君子哉世有一面之交淡人名利之心若陳公者乎吾今迺見紫芝翁宇也旣而識嚴仲純於長雲峯蓋四飛絕頂云夜半披衣觀日出湖海風氣適美卽之也如飲醇醪至其家鴈行翩翩尊人玉室翁乃出三更淡語薰人以孩赤而微叩胃臧又時時耀人以星斗顧獨浩浩焉遊

廣莫之庭一室不拘生產不問繫惟不問直土
首之厭薄之耕自奴織自婢無潤乃公耳也以
忍辱爲真仙虛舟飄瓦罔聞知凡此者視無形
聽無聲老親在堂不分其神其神乃凝余喜蘿
附護侍左右一親孝子之婉愉累日不去衣帶
之水未能鼓棹訪太翁于梁溪獨耳懷南先生
名與司寇弟埒登堂納履異聆黃谷之秘而余
髮種種矣乃先生少失怙具神識者從旁窺之
色猶孺也以此玉翁遇長者之轍來必觴懷翁

翁引滿稱快而後敢自舉卮越明年春秋高九十矣

朝廷修乞言之典杖於國杖於鄉孰有如司寇兄弟父子祖孫者以人重不以爵重也余又聞玉翁年弱冠還墮壁之金于外舅與讓手創之業于嫡弟其念母氏之劬勞也一似懷翁埋稱二孝子云施德而或勿矜受侮而或勿言無他一出口不忘親也一舉火不忘族也故歲入寧自菲薄而同姓皆有分粟于姓化之少年若老

成高才若虛谷印關而瞻紫氣者或比之登龍
門焉余媿吳君文與仲純締兒女姻以賀之言
屬夫立言之難也善言德行若是者延年滋筭
砥世礪俗皆惇史之能事也夫

褚麟郊壽序

躋公堂酌斗稱觥祝萬壽無疆人臣致壽于其
君而後饋漿授杖言可憲也若乃長至書雲呼
嵩紀瑞堯舜在上元良豫建而耆俊有秩列在
冠裳誕生其間如麟郊褚翁率先父老頌萬年
有道之長謀諸姻娅符禹郭君無鏤金襲錦無
陳說仙玄其質諸悼史以佐朋酒余曰洪範之
福五俶於壽康華封之祝三成人猗似此黃髮
之算與美錫之祉也壽居榮而饗乃逸子克樹

而澤乃長。何以榮爲。長吏廉貞。恬素耳。何以樹
附青雲。賢良方正耳。斯二者。翁皆有之。可祝也。
於是爲大椿之歌曰。彼廣莫兮無根。樹德兮大
椿。上扶疎兮蔽日。下軋芴兮干雲。願大年兮無
斲。歲八千兮爲轄。爲叢桂之歌。歌曰。望小山兮
嶺岑。植連蜷兮布陰。橫五枝兮蓋前。挺八樹兮
成林。蔚國華兮森郁。并宅相兮芳芬。爲蘭蓀之
歌。歌曰。蓀擘擘兮揚揚。發朱榮兮國香。轉光風
兮階卮。流麗日兮堂皇。斯時協氣雲溶。歡聲雷

砥玉樹蕃葱兼葭是倚昔豫章之有梅福也以
一尉高懸其冠陶彭澤之賦歸來也到官八十
餘日漢廷師傅不云乎知足知止翁未引年而
乞終養或曰白首娛親天生佳子以報梅翁似
也然公自對可概見梅子真既隱假軺傳上書
淵明耻膺仕而集錄古學羣輔思見太平則翁
授之子若壻矣而歲以其誕辰上天保孔固之
章賡萬福來同之什邦君大夫將行憲老彝典
以獎恬而勸讓也

蔣母褚夫人壽序

知人子莫若其隣子，知人母莫若其隣母。知人子，母善，頌善，祝莫若隣母；與其子居，恒之敦勉，吾母不好擊鮮，腆好聞善，間取古人肅穆靜好，雜今里閭深閨，綴教刺繡，娛親極歡，和笋蒞以進，則色喜而恒，美蔣伯母一庭賡協，詔子若媳，母師師之子，若媳，搗母，指盛稱伯母，弗祿康矣。將有龍光之孫，謀焉，則色喜而猶曰：爾知蔣伯母也，不若我試，爲我携三言壽仁錫敬，唯益兩。

家居隔一溪過從契濶然賓容兆徵蘭玉愚母
子必祝聞賓客室中亦祝吾家就館輩遙指羊
酒賀于胸臆兩家子不言旁媪代言之夫古人
友其子或拜母于堂乃至車行酒趨繡褌擁繞
未有望入懷之麟鳳訂將抱之荀陳自我兩家
始也詩歌將母煌煌簡書埤遺置弗道出其瞻
望劬心爲賦來諗賤人世之圭綬貴孝子之精
神必有說矣爲人子反盛誇皇華車馬于是事
親之禮數日煩榮親之綸誥日貴友生過情之

繪咏日盛而人子自顧無一物可持之親者于
是乎稱賓容能子夫夢寐持一快心平旦持二
惕心遙集古人持一平心此三者孝子所以致
之親也賓容昆季有焉若夫兩家母訓子同米
藥之貞操同樂善同兩家子祈願于親同然愚
也甚媿賓容矣賓容多讀書不輕下一語愚如
食生物不化又必吐出之乃已賓容善飲微酣
卽止愚不善飲對客浮白常連釀賓容靜氣微
心思有概于中易發議論賓容時親蒲團愚雖

肩行李常在蛟龍之窟雖然賓客有可以致之親者伯母之誨也愚無可以致之親而能自攻其過亦吾母之誨也蔣伯母聞之曰孺子猶可教也茲辛酉七月六十華誕仁錫跽吾母而請向之三言曰儀之一矣心之結矣均宜壽旣以教子波及吾子廣宜壽温温令恭咸有肅心莊宜壽愚乃跽而颺言曰均其首也咏多子也繼之以萬年含飴之樂在懷也其在膝矣爾時車行酒趨繡褱擁繞于吾母之前曰此蔣伯母子

之子也而吾母色喜愈可知也

奉賀誥封俞母楊太夫人八十壽序

凡人子能致于親與朋友願致于友之親者唯
近情斯可久唯好修而不諛斯近情何也憲老
乞言則女宗母師之言亦可乞也未聞索言以
壽者然與其以人子請不若以子之友請夫登
堂拜母禮之重焉者也薄海內外布武接武至
于其庭沃洗獻爵曰唯樹背之萱非有道君子
之言不敢以侑亦猶行古之道焉雲間諸先生
與俞母楊太君張筵設帨稱八十緜在癸酉八

月也。太君事新宇僉憲公名宦于其仕。祭酒于其鄉。而彥直孝廉天下士也。以爲之子。于是母夫人年彌高。教彌遠。當如古韋母八十習周官音義。就其家之講堂。置生儒百二十人。隔絳綃幔受業。况其鄉之密邇徽音。稱母事師事者。平乃越百里。問執爵之言于不斐諸君子。固有說矣。與人子自爲講。誠不若交游侏也。與此邦之人。咏歌壽母。不若廣其教于縣寓也。吾聞彥直于書無所不讀。其求友也亦如之。山于岱之水。

于海之人于歐陽得其似者而不喜也即使未
遇其人猶懸空青之眼以待之不屑作今人評
非是母不生是子信夫遂陳古證以祝厥初生
民時維姜嫄古之頌母也質馨爾席膳潔爾晨
餐古之補詩也平就今人言之自華孝子所爲
秉修圭章行誼何如哉孰意夕膳晨餐之補近
孝也無他愈近情孝子愈難盡也吾又聞新正
翁服宿廉彥直禊躬淡文章經濟之外超然
解母教也又不能釋文擇交則互勉其所不

足今天下才情意氣舉皆有餘也然百姓與軍國舉皆不足也唯士大夫居不足之寔貌有餘之形漆室之懷慈母厯焉欲令其子與賢良方正、淡念遠慮者處八十年如一日而予嘗有感于王珪之母知其子貴詢所與游益貴以房杜公輔器孰知河汾之間有一人焉曰文中子、旁聽諸公而笑曰諸公正須臨事得办其後太宗欲興禮樂茫然無以置對蓋有所不暇也勞苦則善心生子不及見而母見之母不及見而師

友見之此謂真慈孝真朋友可以登堂見母而不愧古之言孝疴癢膏和必視必察及其策名唯簡書是畏將母不違行邁深長思耳王士安之母訓目必存教心必求道雖無瓜果猶樂也乃感激就房坦學帝爲借書二車劉真長或比之袁羊或比之范任其母勸勿受蓋好名之無益如此不然臘日歸止于閭外大夫乃從臺上望言之君王孰爲先容噓借哉當時記者不聞于庸行叙述之外繁其揚詞惟近情乃不可及

甚矣夫佩韋佩茲情性可移也慈母見及此矣
舉杯邀月履車響臻進此質言太君聞之曰爾
所交多賢者爾所未交而能以聲氣來之甚矣
其善祝也

。賀劉母成太夫人壽序

天子御極之二年、放榜首景陵劉天、積粵攷邑之魯文恪公、距弘治壬戌一百二十年、又

奉宗拔擢第一人、也、應期以出舉、朝慶得端士、樂爲歌壽、毋蓋天和、飲江海心、揖山岳德、初念伯母成老夫人、屆六旬、稱觴、辭不就、館試、仁錫爲援引、熙朝盛事、

文皇帝初臨御、簡用文學之臣七人、俾佐睿密、召七命婦入覲、中宮、惟金公幼孜、以母行宴

賚隆加有冠服之賜壽至九十餘歲子爲母夫人願之乎天和始昕然莫逆也以所聞父子兄弟同居共箸三世天和齒及弟昆脣頰間如鈞天自奏伯母處兩姑之間不矜素封事栗烈之姑而煦其顏癸卯以後媳兼子伯有聲於庠不困以米鹽出粧佐之夫出粧以佐夫持籌易也寬伯咕嗶難也以樓舍居其兄難也讓中分之業闢無間言尤難也甲寅伯登貢貧滯京邸丙辰天和偕計御以歸母實命之尤難也恭儉樽

節退讓純純常常家有芝蘭門無襍客天和挈
三弟於一館讀書丹臺觀者二疑則考舊分別
然否想見讀書之樂如踴躍雲霓游觀滄海積
厚流光五丈夫子其干霄之勢如旭日之升平
夫侑以辭而不腆其幣何也趙司成類菴過魯
文恪公邸持二帕爲西涯壽魯公入索帕不得
會里中餽魚食過半矣家無他物持以祝西涯
烹魚沽酒卽事倡和此景陵家法也宋祖徵時
渡景陵漁人辭不受錢卽位免漁課今余亦將

持一物爲壽可乎。曰：讀書。詩不云乎：罄無不宜。受天百祿。是以吉祥善事不一。惟讀書無所不宜。宜爽。曙宜。深夜宜。高山流水宜。薇垣玉署宜。春日載陽宜。雨宜。雪宜。少宜。壯宜。弟宜。兄宜。獨宜。共宜。將宜。相宜。君宜。師蓋天下和平之上瑞所集。轉也。自天啓首科。始建極錫福。景陵百祿聚賢母一門矣。載賡曰：懋哉天和靖共爾位。正直是與懋哉四君子。博學強識令聞長世。

歸母張夫人八袞壽序

歸伯母旣膺多祉天啟元年春王錫福黃流在中春酒紅醑賓筵斯啟客曰子鄰比媿嫺淑慎言提其耳且葺鱗著屐將爲台雁之遊記稱萬八千丈周八百里赤城霞起瀑布石梁欬笑間流水相隨有鳥嚶鳴如笙簧目山樂官以俯壽卮賀之言宜莫遜也看月長虹倚枕爲序爰稽世譜張老夫人之先有裏齋公起家甲第著聲虞鄒其祖也及從鹿城縉紳間聞有龍城先生

好學強識躬行不怠。阨於數竒。僅縫掖老。其父也。既事益川歸翁。歸簪纓蟬聯。多素封翁夷然弗屑。夫仁義嘉種也。糠粃可鑄堯舜。寧舍彼取此。竭誠奉親。生平不作綺語。曰寧失金。毋失諾。與人無町畦。曰寧人負。毋我負也。當是時。調酒漿。眎衿鞶。課組紉。內持筦鑰。而外供賢士。芻秣恥問錐刀。聲隆隆起。而家亦日振。實惟母夫人持大體。善行其節儉云。入嗣伯闇。少負竒槩。親仁下士。讀未見之書。奉養無方。中外稱幸哉。有

子以慰翁千古而娛母昕夕。蓋予觀損益天道也。而凡益之道。與時偕行。則造物者原不厭取。亦不厭取之多。第貴職受之者。如曰天道猶張子。彼日升月盈。滋至之天休。覆載間何時不益耶。唯歸毋慈而溫。伯聞誠而敬。降福穰穰。又何疑焉。予尚未登台雁。何敢遂邀安期。劉阮第聞動一善念。行一善事。如陟天宮。如奏天樂。如與閭苑羣僊比肩而立。接膝而語。且仙不在蟬蛻。嘗遊戲塵埃間。凡仙無二境。非不凡之謂仙。

能盡其凡之謂僊耳。竹苞松茂、頌孔固也。肯堂肯構、翬章斯飛、孫謀燕翼、歌壽母也。子復生子、天定之祚、不遑將母、賦皇華也。龍飛開選、鳴鹿呦呦、若是者皆凡也。人未有與人爭仙、獨與人爭凡、凡不能爭、卽仙不能舍、又安知雲間仙子、羨歸母膝下、蔗境卽蓬瀛之樂、不如乎。伯闇、嶼卓立、聲高月旦、文如璠璣、自督學代巡而下、若監司、若郡邑、皆國士遇之、至負人倫、鑒矜重許可者、稱其子必式其母焉。猗與、令孫、英、英、玉。

樹宅相多偉人行。且與伯閻同登天府之書。如
千丈瀑布而上跨石橋。萬頃雲花而霞鮮老幹。
誰秀黃巖樂安之流。誰司長生不老之錄。固可
叩台雁而持左券者已。敬以復諸君子。予不日
還從台山最高。浙江微辨縷。彭蠡不盈杯處。汲
取千萬頃。以佐熾昌壽臧之祝。

○ 吳母陸孺人五十壽序

婦德之選推敬姜氏。蓋婉穆伯而子文伯云。然紀其德曰知禮尊其訓曰勞生善其教子曰擇嚴師賢友擅美千古誠足述也。請以此壽吳母矣。舅氏太原翁醇德象賢式金式玉體謙執允國有顯譽惜鵬翅已飛鯤鰈已揚而九萬三千需之後賢式彰閭教云母裔鼎族吳方膺厚而百兩昭肅雍之度車牽垂令德之儀仁同膠木儉比葛覃采藻采蘋格於宗先麟之趾鳳之毛

毋師乎。嘗記古淑人之言曰。慎德勤事。夫慎德以奉翁姑。承夫子。勤事以振艱辛。起孤弱。則知禮勞善。毋俱有焉。尊崇師傅。英豪踵接。仲郢之才。安世之節。元珪稚珪之德位。堯咨景讓之忠孝。問學吾聞。驪山老母。受陰符經。若知禮若勞生。若擇嚴師。賢爰非。即陰符爲經。雲母爲粉。篆字斗文。於仙女所居。王屋者耶。奕奕封章。與玉册金文。並焜耀於洞天福地。珠履先達。何啻登蓬萊而邀松喬矣。且天道猶張弓乎。有嗇必有

豐舅氏生於高門而饒清寒之致夫人以冰雪
榮副珈蓋寒溼有陽春焉况稱觴屆方春之候
萬有千歲錫類無疆祚胤長矣第祿康矣

許母沈太孺人壽序

甫里沈太孺人以相國用許太翁稱賢伉儷以
丈夫子玄祐翁稱賢母子玄祐如已出稱賢嫡
母克事舅子靖公而安季子稱賢宗婦顧自廟
見脫簪珥起素封疑孺人計不出泝緝統曉不
踰倉箱纂組抑何婉嫕廣淵皎皎杰士哉孺人
操治生之智而彤史垂大年結不然五湖一舸
亦傳貨殖豈結駟者流膽智遠矣龜勉有無外
禦其侮將竇臆莫覆計蟲飛同夢不如其翺翔

鳧雁也不爲置貳陸也一子棘人耳將弓治奚
習計漢廣一葦不如其江有汜也既挾乘矢將
能尅莫療去瘡卽安計百爾封殖不如其燕翼
子也季再世築疾堂構娛之筦箏安之廬井授
之詠予竹苞松茂不如其未有室家也夫勇於
償負舅氏以寧錐刀之末弗爭而家用蕃碩廉
於自出準人弗私衡石之鈞惟謹而施從厚贏
孺人計之審矣孺人操此四大計視黃金一擲
耳豈沾沾治生也者否則日持管鑰課力作宜

斤斤不離局鑄一旦以玄祐事鑿王悉謝不問
曩所目管而意匠者不亦俠烈之士行耶東海
屠緯真曰息肩季卽息肩老人知母氏之劬勞
者夫是以玄祐勤施明光葺甫里之舊先哲既
零其雨而出日矣聽長樂之鐘朝士如雲倒屣
而前席矣縑緗廣記晤言二唐中立楊先生集
藉不朽善古文詞新詩彈丸視下聽上當門者
鋤端亮之士秀于岩谷願爲脫屣風流蘊藉自
饒清音不廢絲竹所謂撫琴動操衆山皆響者

也。太孺人擇宜子而進之。文定厥禮。實惟女士
爲陸孺人。貞靜夙夜。蓋天授云。孺人智於治生。
知人能下。大都若此。計然之策。官山海。耦時而
不與時爭。時莫先之。孺人所以治生。其所以引
年乎。家弟蘿附。今孺人甫六十。貞松秀栢。旣歌
壽母。弗祿爾康。說在海濱人。鐵網濟濟。文孫皆
如王。謝標格。使論寶于晉。楚之壇坫。豈讓左史
倚相哉。此與曾孫之茨廩孰多。固知太孺人治
生計宏遠矣。

壽都綱東禪仰峯八十序

西方有聖人焉不可見得見佛弟子好善者斯
可矣善無他恒是恒無他盈虛有無泰約之間
不起一浪心不駕一浪語是儒不必誇益代修
詞立誠者是釋不必詭超凡慈悲度人者是西
方聖人以空化執智化也以福利化益仁化也
以緣業化妄術化也以神道化愚劫化也要之
不善惡乎化不恒惡乎善東禪仰公四大海水
慧眼啟明五須彌山毫相崇絕足踐徧名山及

其栖真一室、若上古也、交游滿金紫、及其握手
故人、若寒衣之親體也、虔奉辟支、傳燈分座、超
然正覺、荆建前殿、霜斤沐楹、玉砂瑩礎、不翦年
而雲攢四衆、風搖寶鐸、霖拏六扇、月照金源、頃
感大殿地、其一角、慨願捐金首倡、一寺化之、翕
然助義、至督理北寺、淨屠潔廉、肅慎迄奏成蹟、
大都志在芝桂、譬芻豢於糠粃、豈或不可及已、
徒衆化之、存岩而下、如梵林輩、皆能師其意而
強爲善、世掌沙門、同衣化之、雜簿書於經梵、鳥

亦能歌解桎梏於妙音魚皆出聽仰公質任中
孚婆娑其間雖復銀函東度金疊南翻秦景遙
傳空蘭私記豈能及其神感哉戊午仲秋法臘
八旬真氣勝而塵累捐五蓋破而清機開寶華
不夜玄圃常春堦樹江山緇素咸共式金予適
讀書清溪之聽雨關走筆賦四律以祝而因述
其善世壽世之概有合于恒久之道者如是